

本朝分省人物考

人物考卷之六十四目錄

江西吉安府二

陳廉

附陳昌

孫鼎

胡廣

楊士奇

陳雷

彭豫

彭琉

梁洞

陳循

錢習禮

余學夔

朱與言

羅汝敬

郭循

李禎

李時勉

周忱

羅通

劉髦

劉子輔

劉益

劉廣衡

劉球

鄒緝

羅肅

嚴樞

張洪

羅俊

張宗璉

本朝分省人物考卷之六十四

江西吉安府

二

陳廉 陳昌

陳廉字孟潔泰和人幼時穎敏過人讀書日千餘言
通其大義十二治詩經下筆爲文章桀然有聲譽於
七也長者其事親能適其心未嘗得一錢以入私室
父孔碩從子有怨家欲報孟省孟省已卒則構誣詞
嫁禍孔碩廉憤曰無父焉用我爲伏訴闕下孔碩得
白不陷於誣孔碩沒撫育弟妹甚厚宗戚故舊有急
趨赴之恒恐不及平生爲人排難解紛不可數計而

不爲勞磊落豁達喜交際四方賢士大夫過泰和者必造其廬傾倒而後去永樂乙酉以國子生中應天府鄉試明年中會試禮部擢第二甲進士授翰林庶吉士與脩永樂大典爲校正官性嗜酒雖紛冗不廢嘗曰王猷愛竹豈比我哉竟坐是致疾疾革壺觴猶在牀榻間卒年四十五從弟陳昌字孟京登永樂四年進士第授翰林庶吉士時朝廷廣召文學之士纂修永樂大典孟京與編校晨入晚出未嘗以私廢其博達明審老師宿儒多讓之性孝友家素貧幸仕得祿而薄甘旨未嘗充其母甚樂也愛其弟恒約已

以裕之卒之時家徒四壁顧其妻曰死生常道勿戚
戚身後事其在諸兄汝惟善視兩兒不可令斷絕讀
書種子耳不一言及他事卒時年三十有六

孫鼎

孫鼎字公宜廬陵人永樂間以鄉舉歷江浦松江學
博士甚得士心楊文定溥薦爲監察御史督南畿學
政立教以德行爲本而文藝次之置本原錄錄諸生
善行以身爲率不事譏防行部令勿先知單輿猝至
諸生集輒閉門面試一文或破題數首隨閱隨定畢
便開門呼名而出案牘隨之先後允愜私囑者無所

厝手時應天苦旱饑甚奏免其租什七賑濟萬二千
餘石全活甚衆庚午秋 上北狩詣闕上疏請隨所
用以效死不報乃自矢於文信公祠去蒞所部道遇
金尚書濂慷慨對泣有萬里丹衷扶日月兩人清淚
對山河之句其忠憤如此金陵王林朴以賢良徵鼎
薦以自代不允而擢林朴僉事董廣學政會勅封鼎
父母得告歸省父聞 恩命至騎以迎鼎塗行控御
甚虔觀者榮之明年還朝念親老請致仕歸後祭酒
司業缺當道屢欲論起之不果歸六載卒

胡廣

胡廣廬陵人初名廣廷試傳臚更名靖永樂初復舊
名字光大齋居名晃菴因以爲號十數歲喪父已有
志問學內浸漬其母訓外則受從祖子貞之教故德
器不凡旣冠薄遊閩中前輩率忘年與交歸而從黃
伯器講論得所歸宿之地而日進焉以進士第一爲
翰林修撰永樂入正大統陞侍讀二年陞右春坊四
年進文淵閣大學士又三年卒贈資善大夫禮部尚
書謚文穆國朝文臣有謚自姚廣孝與廣始 仁宗
嗣位加贈榮祿大夫少師廣居官敬慎在 上前承
顧問必據理對而以忠厚爲本未嘗及人過於奉

旨制勅視草卽有所見必具可否以聞多見采納事
太宗十有七年周訥建請封禪 上不聽獨廣言與

上意合旣退作却封禪頌奏之丁母憂召還 上問

百姓安否對曰安但郡縣窮治姦惡外親爲民厲遽
召罷之兩考京畿鄉試四爲廷試讀卷鑒別公明奉

勅修 高皇帝實錄及五經四書性理大全皆爲總

裁志於扶植名教獎掖善類於利不苟取與於匪人
不苟比小人有不滿公者屢造言毀之 上不聽遽

黜毀者而廣執之愈堅意度蕭散雖身處榮祿未嘗
一日忘山林幽澹閒遠之趣退惟閉戶讀書而已其

學博究經史百氏下逮醫卜老釋之談亦皆旁通爲
文援筆立就頃刻千百言沛然行雲流水之勢賦詩
取適其性情近體得盛唐之趣工書法行草之妙卒
年四十九所著有晁菴扈從集

楊士奇

楊士奇名遇以字行泰和縣人幼孤力學越章貢浮
琴江艤鄂渚登黃鶴樓與蔣隱溪子立遊慨然有幽
人貞士之志已而赴試吏部將官之尚書張統讀其
策喜曰明達時務有用之才不但文詞之工而已列
名第一授王府審理副會 成祖卽位遂擢爲翰林

院編修與解縉黃淮胡廣胡儼楊榮金幼孜進內閣
典機密尋陞侍讀 上嘗諭士奇曰朕知爾文學親
擢置此爾但盡心勿自疑畏士奇感 上知遇忠勤
不懈以修其職 仁宗爲皇太子又以本官兼左春
坊左中允益見寵任侍講學士王達講乾九四舉儲
貳爲說 皇太子疑其言問士奇對曰此宋儒胡瑗
說也曰與常人言亦舉此說乎對曰程子常曰卦中
六爻人人有用無所不通王昭素嘗爲宋太祖言之
矣講臣非有據豈敢妄出意見哉饒州士人朱季友
獻所著書斥濂洛關閩之說 上覽之怒曰此儒之

賊也時禮部尚書李志剛及士奇等侍側上示以
其書士奇曰當盡燬所著書庶幾不誤後人遣行人
押季友還饒州悉索其所著書盡焚之五年廣東布
政徐奇朝京師載嶺南土簞諸物將以饋廷臣或得
其單目以進上閱視無士奇名獨召士奇問故將
以私交罪之士奇曰奇自都給事中受命赴廣時衆
皆作詩文贈之故有此餽臣不與名者以當時病未
有作不然亦不免今衆名雖具然受否未可知且物
微甚當無他意上意解命中官燬其目一無所問
本年陞左春坊左諭德仍兼侍講禮部尚書鄭賜爲

侍郎趙犴所間憂鬱感疾勉強奉職如平時忽以卒告上疑其自盡召翰林諸臣問之士奇進曰臣觀賜病數日但未敢卽安昨晚同立右順門下賜忽仆地旁人怪賜無人氣臣遽命其屬官掖出午門外上聞士奇言曰微汝言幾誤疑賜賜本君子顧才不足耳命工部與棺禮部往祭七年車駕巡狩北京 皇太子監國 上命蹇義金忠黃淮與士奇職輔導義於事多疑少斷常持兩端曰事當熟慮不然必有後憂士奇曰事豈得不思但多思則惑惟據理而行皇太子聞而笑曰自今議事擇當理者從之不必多

思致惑也春坊贊善王汝玉每以詩法進 皇太子
皇太子以問士奇對曰殿下明經講道之暇娛意文
字兩漢詔令皆可觀非但文辭高古亦可裨益治道
詩非所急也 皇太子曰儒者亦作詩否士奇曰儒
者固皆作詩然儒之品有高下有德行之儒有經濟
之儒專意詞章謂之俗儒已耳九年 上還南京一
日退朝召士奇問曰爾輔東宮久果何如士奇以孝
敬對 上使言其實對曰凡有事宗廟祭器皆親閱
去年將時享頭風作醫言當汗殿下曰汗卽不敢蒞
祭左右請遣人代斥之曰 上以命我又可遣人代

平遂親祭祭畢汗徧體無藥疾自愈每進御用物皆躬閱封識遣行不輕信下人車駕北征不敢寧居恒月中是始食駕還而後能安 上曰此子道當然士

奇曰古聖賢亦皆盡其當然者耳殿下天資高朗有過未嘗不知知之未嘗不速改又且存心以愛人爲本將來必不負 陛下付託之重 上悅十二年正

旦日食先數日 上問禮部及翰林諸臣正旦日食

百官行賀禮乎尚書呂震曰日食與朝賀不同時當賀士奇對曰日食天變之大者也宋仁宗時元正日食富弼請罷宴撤樂宰相呂夷簡不從弼曰萬一契

丹行之爲中國蓋後有自契丹還者言虜是日罷宴
仁宗深悔今誠宜免賀 上曰君子愛人以德士奇
言是也遂免賀及宴十四年 上聞高煦有異志還

京師欲發其事疑未決獨召士奇問之士奇對曰臣
事東官外無敢與臣等言者但漢王始封國雲南不
肯行改青州又不肯行今知將徙都北京惟欲留守
南京天下皆疑其心惟 陛下善處之使早有定所

上默然起還宮遂命削其兩護衛處之樂安州周
王楚王來朝謁 孝陵 上命東宮皇太子太孫及

陪謁翰林諸臣拜位當何如衆疑未有言

士奇對曰二王尊屬當分列在前東官稍後居中

皇太孫又後亦居中諸皇孫與太孫同班分列兩旁
上出片楮所書位次與士奇言合然下有十六字未
書授筆命士奇足之遣鴻臚寺寺丞周昇持赴陵俾
率行之少頃復命以宸翰上 上遂以與士奇寶藏
之十五年 皇太子命士奇纂周易本義要旨爲一
編既進 皇太子悅賜名周易直旨踰年輯成又名
曰周易大義本年陞翰林院學士仍兼諭德會 上
巡北京命輔 皇太子監國十二月有疾 皇太子
賜諭并以寶鈔酒米給之二十二年八月 成祖北

征上賓學士楊榮歸自行在以聞 仁宗卽遣皇太
孫往迎梓宮時京兵皆隨征在外城中空虛慮趙府
兵爲變因秘未發喪 皇太子然之顧急未有所與
以問士奇士奇言 上所用東宮圖書今請暫假之
行此一時之權歸卽進納 上卽取付太孫曰有啟
事以此封識未久當歸汝汝就留之旣而謂士奇曰
卿言誠是昔大行臨御儲位久未定浮議喧騰吾今
就以付之浮議何由興士奇曰殿下嗣位事無大小
皆當盡公此收拾人心之機也恩之所及必先扈從
征行之臣九月癸未尚書呂震言於 上曰今喪服

已踰二十七日請如 太祖倣漢制易吉服 上時

未有答震退徧語羣臣明且易從吉士奇謂震曰今未可比此例蓋洪武中有遺詔今 上於皇考可遠

卽吉乎明且上素冠麻衣經出視朝文臣惟學士武臣惟英國公如 上所服罷朝 上諭左右大臣曰

呂震昨奏當易服梓宮在殯吾豈忍易士奇所執是也士奇以華蓋殿大學士陞少保翰林以士奇所受詰草進呈 上取筆親增二語曰勿謂崇高而難入勿以有所從違而或怠顧謂士奇等曰此實朕心卿其勉之士奇對曰 聖德能容臣等敢不勉忠盡職

有言願不以同異爲喜怒不以喜怒爲用舍成湯改過不吝所以爲聖人茲願 陛下常以古人爲法本年十二月加少傅洪熙元年正月命士奇兼禮部尚書尋改兵部尚書士奇辭曰臣爲少傅大學士已踰涯分尚書一職更不敢當 上曰黃淮金幼孜皆三職鄉獨二職卿勿辭士奇請辭俸 上曰卿於朕勞勤二十年故賙以此祿何用辭士奇曰尚書月俸六十石可養壯士六十人臣受二俸已過分安敢再加 上曰朕成卿志乃聽辭 上監國時御史舒仲成嘗以事忤旨後已陞爲湖廣按察副使矣及卽位尚

書襄義因以他事奏仲成卽命都察院逮治之士奇
上疏曰向來小臣得罪者多 陛下卽位皆宥之今

追理仲成卽詔書不信漢景帝爲太子召衛綰不赴
卽位用綰前史躉之 上喜卽罷治仲成賜士奇米

及鈔幣且降勅獎諭曰卿導朕以仁助朕以德欲朕
爲唐虞之君誠忠良股肱之臣也有卿如此朕復何
憂二月 上以田二頃賜士奇時襄義先已受賜士

奇懇辭 上曰卿事朕表裏一誠資益良多朕心不

忘卿前辭祿今又辭田何執之固也士奇曰臣起自
寒微今受恩踰分豈可不知止足幸少延殘喘得更

事 陛下二三年獲全歸山林受賜多矣 上甚嘉
悅時有上書頌太平者 上以示士奇對曰 陛下
恩澤已敷但流徙尚有未歸瘡痍尚有未復遠近猶
有艱食之人須休息二三年庶幾人皆得所 上笑
曰誠如卿言事有未當皆須直言可也大理少卿戈
謙數言事過於矯激尚書呂震等交奏其賣直沽名
上頗厭之士奇進曰謙雖昧大體蓋亦感恩圖報
耳古人有言主聖則臣直惟 陛下容之 上以衆
言猶不憚因免謙朝而使視事如故士奇又進言曰
陛下有詔求言言不當者不加罪今謙因言取咎

朝臣皆以爲戒且四方朝覲之臣咸在豈能盡知謙
過失若傳之遠人將謂朝廷不能容直言 上惕然
曰朕非怒謙言事其言自有過實者卿可以朕心諭
衆人士奇曰此非臣言能使之信當以璽書開諭可
也 上遂命士奇書勅引過而待謙如初令百官言
事毋以謙爲戒 上以士奇匡輔力多特賜璽書褒
其功併賜御製楊貞一印一枚使藏於家傳之後世
嘗論科舉須是取南北士 上曰北人學問不逮南
人士奇曰長材大器多出北方今試卷例緘其姓名
請於外書南北二字如當取百人則南六十北四十

南北人材皆就用矣議定未上而官車晏駕宣宗卽位遂行之宣德元年高煦反車駕親征罪人旣得尚書陳山迎見上請乘勢移師彰德襲趙王則朝廷無憂矣上以問士奇曰事當有實天地鬼神其可欺乎今日宗室惟趙於陛下最親當思保全之豈可惑羣言上曰吾亦思之皇考於趙最友愛且吾惟此一叔奈何不愛今思所以保全之道欲封羣言示之自處士奇曰更得一璽書諭之尤好遂遣廣平侯袁容都御史劉觀持勅往諭且示以衆言趙王得書喜曰吾生矣卽獻護衛上表謝恩而言者頓息

上待趙王日親厚因薄陳山竟踈斥之二年十月
黎利遣人進前安南陳王嫡孫暲表乞立爲陳氏後
嗣甚懇切 上亦厭兵欲從之大臣有言此黎利之
譎當發兵誅之或以爲與之無名徒爾示弱 上召
士奇謀之士奇曰初求立陳氏後者 太宗皇帝之
初心求之未得乃郡縣其地數年以來兵民困於交
吐極矣此皆 祖宗之赤子體 祖宗之初心保
祖宗之赤子正 陛下盛德何謂無名漢棄珠崖前
史以爲美何謂示弱 陛下勿疑 上意遂決五年
上以四方屢有水旱欲下寬恤之令獨召士奇議

之士奇曰百姓積欠薪藹及採買諸物官府但知督責而民不能輸官糧額重民困無聊多有委棄逃徙者當量與減除部府坐徵買辦諸物不問其地有無一槩取辦民費價十倍不能完年來刑獄不清旱澇恐由於此宜戒飭法司敦用平恕務求實情四方工匠丁男皆徵集京師役於公者無幾受私役者十六七身既勞困而妻孥失顧未免怨嘆當命官察治丁多免其半單丁者皆免老病無丁者除其籍其本非匠誣引爲匠者察實除之今軍民苦漕運而倉廩無關防姦盜相繼恬不畏法宜命風憲官巡察

上稱

善卽書勅明旦行之民大感悅六年七月日旣夕

上微行至士奇宅傳呼范太監來士奇叩首曰 陛

下奈何以宗廟社稷之身自輕至此擾擾塵埃誰識

至尊若變起倉卒何以備之且天子尊居九重恩澤

未洽幽隱萬一有冤夫怨婦窺伺竊發誠不可不慮

也後果獲盜如士奇言 上歎曰愛朕莫若卿朕自

今不復微行矣 上問士奇今事之當寬恤者安在

士奇曰逃移之民朝廷旣赦使復業而家業盡喪又

有公逋私債之擾所在官司不能恤則必逃聚山林

相結爲非請下有司凡逃民願歸者郡縣善撫恤免

其征徭不願歸者聽於所在附籍給以閑田爲經營
居處免徭役三年庶使得安 上曰在彼在此皆吾
民但得人安足矣又曰各處課程先因鈔法不行加
倍徵收蓋一時權宜今鈔法頗通宜減倍徵之額天
下課程皆納鈔惟湖廣廣西浙江商稅魚課舊皆納
銀請裁爲一例 上命納銀一兩折鈔百貫士奇又
言方面及郡守請令京官三品以上及布政按察薦
舉務取公廉端厚能爲國爲民者吏部審其可用奏
授以官後以贓犯罪併坐舉者凡因保舉授官而有
指告其罪者先逮問餘人有驗然後及之庶不爲小

人所誣年來吏員太冗多有昏愚不通請令六部都
察院翰林院同考試選擇而用之軍民中有文學才
行卓然出衆智謀才勇精於武略者亦宜察舉唐虞
之世罪弗及嗣今極刑之家有賢子弟例不許進用
今除謀反大逆外其餘犯者子孫有文學才行並宜
聽用上悉從之英廟卽位之初士奇惓惓以天
下爲心率其同列首言當整肅軍政飭邊防以奠安
百姓南京雖有襄城伯李隆守備其老成忠直如尚
書黃福當令叅贊軍務有事同議而後行庶幾無闕
湖廣山東河南江西去年旱災人民艱食慮有囁聚

爲非者宜委文武大臣各一人往鎮之事定而歸官
員冗濫宜從吏部及內外風憲官考察近 詔寬恤
軍民內外諸司當體朝廷之意凡事務從減省宜令
條奏事有應議者取自 上裁詔皆如所言又上疏
請於山陵畢日早開經筵以廣聖學 上嘉納焉遂
告諭士奇等專以擇講臣爲務尋陞少師同知經筵
事士奇又念今遣御史清軍南北水土不相調習南
人死於寒凍北人死於瘴癘去鄉或萬里或七八千
里道路遙遠困於無資多致死亡臣愚欲今清出山
西山東河南陝西北直隸軍丁皆發甘肅寧夏延安

大同宣府遼東諸處雲南兩廣貴州四川湖廣江西
福建浙江南直隸軍丁皆發四川雲南貴州兩廣及
邊海衛所補足其缺有以填腹裏之空則兵備有實
下人不困 上命公侯大臣議行之天下便焉又言

太祖皇帝篤意養民其餘備荒皆有定制天下郡
縣悉出官鈔糴穀各於四鄉置倉貯之因時歛散又
相其地宜開濬陂塘修築圩岸以備水患天下之民
各安其業此萬世之利歷歲既久姦弊日滋豪猾侵
漁倉穀盡毀凡諸水利亦湮廢或被占奪稍遇旱災
民無所賴風憲不舉守令漫不加心事雖若緩關緊

甚切請令戶部擇遣京官廉幹者往督理糧課豐稔
州縣各出庫物平糴儲以備荒陂塘閘壩皆令修復
具實奏聞若有災之處則候稔歲而後行郡縣官考
滿兼以廢舉爲殿最庶幾官有實績荒歲人民不致
狼狽 上曰此祖宗之良法美意命戶部亟行之或
言方面官及府州縣正官專用保舉卽是恩出於下
欲如故事皆令吏部選除士奇等上疏曰 宣宗皇
帝勅令大臣舉保多得其人間有一二非才葢緣舉
主審察不至亦或實是徇私所司不行糾舉以至如
此且衆臣舉保吏部審實具名奏請聖意允俞然後

授官不允卽不得除授恩實非出於下也但所舉之人後有犯賊必須明正舉主之罪則人知警畏不敢濫舉官必得人詔如士奇議六年麓川蠻不馴當道有貪功者希太監王振意決策征勦士奇爭之不省其後師竟無功八年士奇子稷坐事逮繫給事中廖莊等御史陳員韜等劾士奇不能教子齊家何以服人事上 上優旨留用九年士奇不自安 英宗賜璽書以慰之士奇感泣積憂遂不起卒年八十贈太師謚文貞士奇久在朝廷惟以忠誠結主屢進密疏所言周王求藥等事與啟 太后命史官修建文一

朝實錄及弛收方孝孺片言一字之禁又存心忠厚
急於爲善嘗爲塾師有儒士過館下士奇詢之聞其
母老無所養乃分其徒之半與之俾得束修奉母三
朝史事皆任總裁是是非非悉徵諸實每與同例曰
天下萬世之事當以天下萬世之心處之如有一毫
出於私意不論厚薄皆當獲罪神明所舉賢才列於
中外者五十餘人皆能正己恤民蓋取人必先德行
而後才能無問識與不識博詢於衆而信乃舉不得
者怨誹忿興不卹也永樂宣德中有同列譖士奇於
上者皆賴上聖明不聽士奇聞之亦不爲憾待

其人如初嘗省展自江西還朝所過餽送一切不受
耿九疇時爲兩淮運使餽雞四翼茹一盤卽受之且
携手而行其激揚之義默寓於交際如此所著有沙
羨稿石臺稿文籍志法書志東里集行於世當士奇
訃聞時 上適有事時祭聞之震悼不已急諭禮部
賜祭工部營葬遣行人護喪歸一切贈賻悉加優渥

陳雷

陳雷字士啟以字行泰和人永樂元年興賢 詔下
士啟選中江西鄉試明年中禮部會試召入翰林爲
庶吉士修永樂大典超擢禮部祠祭郎中授奉議大

夫呂震爲尚書屬官諂附者率得近尹昌隆不爲諂
附以罪去之卒擠以死同列以是惴惴士啟獨任直
道不苟徇或舉尹戒之答曰人各有命吾恭勤於職
以聽命耳枉已媚人以求容不能也呂雖惡之卒不
能害丁內艱去服闋還舊職無幾陞山東布政司右
叅政士啟寬厚愛民於事必盡心而襟宇濶達不察
察以爲名不苛急以責效待下常采其所能而舍其
小過數行所部督徭賦不嚴期約民得自便故事集
而不擾青州歲歉郡具饑民之數上聞朝廷遣使
偕士啟如數賑之粟比至而饑民之數倍增使者再

議奏俟報士啟曰民命在旦夕若再奏俟報旬浹間
餒死多矣請發奏卽出粟脫有罪請自任不敢以累
遂獨具奏 朝廷從之三載考最賜誥命授中大夫
高煦潛謀不軌稍覺士啟適至青州聞之暮夜馳歸
語三司同具密奏罪人旣得士啟從陽武侯兵部尚
書錄其餘黨撫安人民遂同署名以進命清理山東
諸郡軍籍之其姦者無所容枉者賴以直宣德六年
八月卒於官年六十六

彭 豫

彭豫字與志泰和人自幼岐嶷稍長讀書以明道爲

務從學安成劉雲章久而益有所得豫旣孤特寡偶
持之愈堅數年就聘萬安訓導以上書言事擢香山
丞香地遠俗囂爲縣者率尚苛猛豫一務寬大緣海
諸衛屯兵暴橫爲民害往往擇民膏腴田誣以荒廢
據占自利郡縣不能制豫毅然曰奪民欺上著在國
典屯不還所侵田必執不貸兵知不可犯悉還之瀕
海歲旱衆禱不應豫曰豈有爲文具而能格天者乎
卽自齋沐致禱越二日大雨霑足縣民舍火且延及
官廨豫叩頭虔禱風反火滅永樂六年以七十卒於
京居家事親孝執喪三年不御酒肉人未嘗見其啟

齒性簡淡無他嗜好惟寶愛其宗譜與先世手澤文字踰於拱璧嘗語其子若孫曰知愛此則能愛身矣聞有存其先世及劉雲章片文隻字雖百里外必奔走求錄之

彭 琉

彭琉字毓敬安福人永樂甲午首領鄉薦戊戌登進士第觀政憲臺時營建京營大臣以琉才薦琉督工集事纖私不染應天諸郡咸服其廉令出無敢後期者吏受賄立置於法夫道亡者當械琉以誠感之曰能自首者免於是首者十人而九溧水有虞真素以

才力自雄爲梗疏列其惡狀真計窮而出口爾所以
安於豐產者皆君上之賜也獨不知爲報邪真叩首
媿服自後無敢梗者明年以山東夫役緩於運木復
委督之令甚嚴衆爲之危疏如期而還時侍郎李友
直統其事嘉其能而延譽之名益著明年冬以親民
職重擢知政和縣御史李宋時巡銀場懼疏不容其
家人奸利乃妄致其罪謫徙沛中處之泰然自得洪
熙改元用薦者授臨清教諭疏作新士習具有程法
諸生莫不悅服感激奮勵多底成才疏在師席凡三
典文衡楊文貞高其學行薦陞翰林編修曰是職不

易稱也益勵學忘倦雖置不恤預修五倫書及宣

廟實錄同事者服其精勤正統改元賜勅階文林郎
時朝廷留意人才乃簡儒臣學行淳正者十三人授
以憲職提督天下學校疏與選中陞廣東按察司僉
事既蒞任立教條嚴考課歲歷郡邑開導諸生凡費
舍廢缺者增修二十餘所書籍不備者咸刻而傳之
嶺南士風爲之不變科目之盛幾於中州復兼督農
桑黜陟官屬奉法不撓人服其公朝廷嘉之尋陞山
東按察司副使仍理學事景泰初罷提學改任湖廣
奉勅贊理廣西軍務益孜孜不憚勞涉未幾引疾致

仕五六年忽疾作不能言昇至正寢精神不亂意欲
永訣乃秉筆以書有曰內不見已外不見人又曰保
躬全歸始終不移書畢而卒天順戊寅六月所著有
備忘錄慎菴等集若干卷藏於家

梁洞

梁洞字挹之泰和人永樂乙未進士擢北京行在戶
曹主事改刑部既滿陞郎中宣德己酉十一月十五
日卒於官年四十六初爲進士奉命賑徐州饑民
時蕭碭二縣民亦多饑者洞亦欲賑之有司以未有
命沮者曰民皆王民可坐視其死耶有罪吾自任之

遂發粟賑濟多所全活事聞 太宗皇帝嘉之而有
司皆以坐視民患得罪其後洞詣北京至徐州二縣
民服役河上見洞呼曰此吾父也嘗活我我無以報
凡百十人環之拜且泣洞慰諭遣之乃得行衣不問
故新必鮮潔完好居官出人駟從亦整飭如儀法曰
吾不能齷齪自汙以取名人以是疑之及病卒餘財
無幾田園亦不加於舊他之仕者外若循謹往往出
高賞市良田深池構大厦無賴子弟恃此立聲威凌
善柔鄉里怨苦之然後信疏之行非衆人所能及也

陳循

陳循字德遵江西吉安府泰和縣人蚤有文名永樂甲午舉鄉試第一名十三年乙未會試擬第一考官梁潛以鄉曲避嫌改取林文祜又以祜字罕見改取洪英曰此洪武中英才也而循第二及廷試擢第一授翰林院脩撰 太宗時重儒臣賜第萬寶坊十六年駕幸北京命循往南京取載秘書自一部至百部以上各取一部詣行在遂留用之十九年三殿災循上疏多見采納洪熙改元轉侍講宣德初年與楊溥專直南宮備顧問又賜第於玉河西五年庚戌擢侍講學士時御史張楷上詩涉時政忤旨循力救之獲

免六年辛亥御史陳祚出按江西上疏勸讀大學衍義書疏中有左右讒淫嗜欲邪佞等語涉譏訕上不悅遣官校逮繫并籍其家時命廷臣會問循對曰是書述帝王修己治人之要誠所當讀俗士迂濶且處遠外不知聖上嘗讀之矣怒之誠當但緣於忠愛所發無他也上意稍解竟緩其法正統元年命兼經筵官甲子命入閣擢陞戶部尚書仍兼學士循奏復翰林官於早朝時當立於金臺左側於午朝時當先諸司奏事從之本年土木之變也先擁駕入關索大臣于謙胡濙王直出迎衆知其詐循奏請勅各

邊精騎入衛京師又多發榜文招諭以疑其心也先
計窮復遁及也先遣使請和循等請勅諭阿剌并賞
來使令回以緩其譎詐之情仍勅在京各營各邊關
整搦軍馬以備從之未幾虜悔過送上皇還京循
等奏請遣使迎復還居南宮景泰八年正月 上染
疾不朝十二日禮部會內閣及羣臣議請復立茂陵
未及上而奪門之兵起矣徐有貞以功入閣助石亨
輩謫循戍遼東鐵嶺衛未幾詔還鄉以壽終循久在
詞垣深知典故應酬揮筆立就入閣掌機務典冊制
命皆出其手屢爲考官去取精當所著有芳州集

錢習禮

錢幹字習禮以字行吉水縣人自幼喜學凡所師友者見其文敏而思深且多出腹藁莫不奇其才永樂六年江西鄉試第一明年會試第十時車駕幸北京廷試不果由是從遊京師間縱觀聖朝政化之美聲名文物之盛四方萬國謳歌朝覲之會同而才益進九年廷試賜進士入翰林爲庶吉士尋陞檢討叅史職甲辰會試命爲同考八月仁宗卽位一新庶政陞翰林侍讀與知制誥洪熙元年勅同修成祖實錄及仁宗升遐宣宗正大位又勅同修

仁宗實錄詔許展墓焚黃承命以往丙午促召還京
命完修實錄二年春闈命爲同考官三年戊申元夕
賜文武近臣觀燈萬歲山賜宴及文臣賦詩以進賜
之鈔四年八月應天府鄉試命爲考官十二月朔霜
寒甚上命光祿賜在廷羊酒以禦寒五年兩朝實
錄成賜金織襲衣銀幣考禮部會試陞翰林院侍讀
學士七年主考北京鄉試十年乙卯春宣宗晏駕
英宗卽位二月上宣宗尊號賜白金秋九月詔
修宣宗實錄十二月賜文綺丙辰正月改元正統
大臣建議開經筵詔可其奏命爲講官二月上臨

軒策士命讀卷勞以羊酒賜宴於禮部戊午四月進

宣宗實錄 上御奉天門慰勞甚至賜白金文綺

織金衣襲陞翰林學士賜宴於禮部八月應天府鄉
試命爲考試官四年充廷試讀卷官六年掌院事尋
考北京鄉試七年爲行婚禮賜紗衣紗帽金廂香帶
等物九年三月大新國學成 上祇謁先聖躬行釋
奠禮幸彝倫堂命祭酒司業以書易進講從臣坐聽
命與其列七月上章乞致仕弗允十年禮部春試
上復命爲考官三月進五倫書蒙賞賚冬十月 欽
陞禮部右侍郎縉紳往賀之對曰吾今任有司職矣

何以賀爲時朝廷稽古右文事多由禮部兼署
事益敬畏偶因病求去益切詔許之公卿大夫饋
出都門皆有詩乃獨取歸去來辭長歌以自快爲人
孝友忠信篤於倫誼待姻戚故舊曾無悖於理者歷
官三十餘年以文章議論爲士類所敬樂於教人學
者亦樂從之遊生平雅負山水之樂遇佳時暇日擇
勝往游長篇短章發於歌詠以揚太平之盛美及老
而歸熙老之堂子孫侍教者十五年比所著述論思
聯爲大卷有應制集詞垣續藁歸田藁藏於家天順
五年卒年八十九謚曰文肅

余學夔

余學夔泰和人永樂甲申進士選爲庶吉士累官侍講宣德間預脩兩朝實錄書成當選學夔上疏乞致政歸平生負直氣非所當得一毫不取家無餘資而博古好學孜孜不倦以終其身云

朱與言

朱與言萬安人永樂壬辰進士歷官湖廣僉事四川副使凡所舉措極得憲體擢副都御史立朝侃侃有氣節每有封章皆切時政多見嘉納後以疾乞歸卒于家

羅汝敬

羅汝敬吉水人永樂甲申進士選爲庶吉士預修實錄陞侍講以言時政改監察御史交趾及廷議舉汝敬陞工部侍郎往諭以順逆禍福交人震恐巡撫陝西一方仰賴尋致仕卒所著有寅菴集

郭循

郭循廬陵人永樂中進士擢刑部主事尋遣往南京錄囚於枉抑多所伸雪嘗論列政務極言營繕之事因改工部官至廣東叅政

李禎

李禎字昌祺，僑菴白衣山人，運甓居士，其號也。廬陵人。父伯夔，力學工詩，名聞當時。禎成童，屬對賦詩，語出驚人。一時才俊若禮部侍郎曾棨輩，相與頡頏，聲名不相上下。舉永樂癸未進士，翰林庶吉士。會脩永樂大典，禮部奉詔選中外文學之士，禎在選中。凡經傳子史以及稗官小說，悉在收錄。同事者推其該博，擢禮部主客司郎中。尚書呂震有巧佞才，狠愎自用，僚佐少忤其意，輒中傷之。而待禎特異，始終不少衰。駕幸北京，洪熙以皇太子監國，兩命權知部事，行在吏奏藩憲員闕，上命簡兩京朝臣有才望

者補之於時舉禎等若干人應召宴於禮部予道里費至卽陞爲廣西左布政使尋丁外艱去先是河南連歲旱蝗民多死徙上震怒被災郡縣有司不以聞者悉逮寘於法思得人以撫安其民改禎往蒞河南旣至宣布主恩䟽滯舉賢救災恤患繩豪猾去貪殘居數月政化大行丁內艱歸河南薦饑本司累奏起禎治之上命奪情乘傳赴官爲治如初勤勞倍之因感風疾往往增劇不待引年堅乞致仕旣歸而先廬僅庇風雨服食清約如寒士伏臘不充處之裕如居雖密邇近城足迹未嘗至公府守長於政

務有所咨決極言無隱病間輒書不去手吟咏自娛
疾革遺訓二子以力學脩身餘無他語儵然而逝所
著有集若干卷

李時勉

李時勉名懋以字行安福縣人五歲卽知學七歲小
學四書皆能成誦甫成童言動以禮旣長大肆力於
學夜以達旦隆冬盛暑無間永樂甲申成進士選庶
吉士預修太祖實錄守制服闕起復授刑部主事
仍與纂修書成轉侍讀三殿災詔求直言時勉條
陳十五事成祖嘉之未幾被讒下獄旣而宥之癸

郊以楊榮薦復其官洪熙初上疏言事忠謹切直

上怒命武士以金瓜捶十數下傷肋幾死明日改監

察御史又明日下錦衣衛獄 宣宗卽位謂左右曰

李時勉能直言忠臣也召對於萬歲山 命誦前所

上疏時勉誦至六事少止曰 天威嚴重不能詳記

上微笑曰正事難言耳問奏稿在否已焚之矣 特

命宥之宣德五年修 兩廟實錄成進侍讀學士一

日 上幸史館撒金錢於地衆爭取之時勉端立不

動 上親取袖中餘錢賜之正統三年戊午陞學士

掌院 上御經筵命兼經筵官每當進講必盡誠敬

莫有所感悟 上亦爲之傾聽聞者莫不稱善以爲
范惇夫其人也六年遷國子祭酒既蒞任崇廉耻抑
奔競剔賢否示勸懲士習丕變諸生有疾躬爲醫療
至於貧不能娶死不能殯者皆爲營辦恩義兼盡不
啻父子七年七月疏奏歷事監生永樂間惟循入監
年月次第撥歷往歲祭酒陳敬宗奏准惟筭在堂年
月淺深其言已行矣然兩監仍以監生省祭丁憂在
家月日准作坐堂此所以延任至十餘年也及其起
程則捏稱丁祖父母或繼母嫡母憂府州縣保送赴
部復監卽將取撥做做成風不可遽止今後惟以坐

堂年月深淺循序撥歷其省親祭祖丁憂俱不准作
坐堂月日如此庶以革宿弊息奸詐正人心而學校
之政自修矣 上命禮部議以丁憂省墓一二次已
復監者照前准作坐堂月日自正統六年十一月又
奏言以後復監者丁憂省墓俱不准筭併行南監從
之八年疏請修太學王振怒坐以擅伐官樹枷號監
前監生石大用上章救之獲免九年三月朔日 車
駕視學行釋菜禮退御羹餼堂祭酒當以經進講而
時勉久病嗽人疑之至是升堂愈敬順色溫氣定賜
坐西南隅講尚書闡明帝堯所以親親仁民協和萬

邦之道辭旨清遠聽者忘倦 上爲之喜甚賜予有加嗣是屢乞休諸生伏闕輒留之歲丁卯懇疏致仕允之命給驛舟賜寶鏹爲道里費去之日諸生涕泗送者數千人觀者如堵旣歸聞 車駕蒙塵號慟上疏言選將練兵數事卒謚文毅改謚文忠

周忱

周忱字恂如吉水縣人永樂甲申登進士第時選庶吉士楊相等二十八人應二十八宿入翰林讀書忱自陳年少願進學 文皇喜其有志之士命加二十九人授刑部主事預修五經大全諸書陞員外郎北

京新建太倉命忱督運南北畿郡之賦洪熙遷越府
長史擢工部右侍郎巡撫南直隸初蘇州府稅糧負
欠六七年約七百九十一萬石常松亦然忱至詢問
父老皆云蘇松民俗大戶不出加耗以致小戶連累
納欠忱乃使大小戶一例加耗奏行南京工戶鑄造
鐵斛發屬縣依造木斛較勘烙印給與糧長收繫於
是出入均平舊糧長每區設正副三名每歲七月赴
南京戶部關領勘合及糧完又皆親賚繳部往來動
經半年率多科歛盤費忱奏減區留正副二名輪流
赴京領回勘合糧完有司差人類繳甚爲省便蘇州

糧額二百九十餘萬石宣德間詔官田一斗至二斗以上者減十分之二三斗以上減十分之三戶部移文止減抄沒官田古額不准減除忱又同蘇州知府况鍾奏言洪武永樂年間抄沒官田人力猶可以勝其所不勝者正在古額官田乃減八十餘萬石舊例不許團局收糧糧多自家徵收忱曰此負欠之由也遂令各縣於水次置團編團或四五區或六七區總聚一處推行止糧長一人總之名曰總收所收者有六七十萬石或十數萬石定與加耗總徵平米上

收糧頭團戶各一名管收千石或六百置立

撥運文簿支撥赴運若支撥羨餘存留在倉號曰餘米次年餘多則令加六徵收又次年益多止令加五除依前撥運外有餘多乃令各縣造倉一所名曰濟農將逐年撥運剩米運入以備賑濟或農民缺食及運糧遭風被盜者賑給借納秋成抵斗還官修築圩岸開挑河道人夫官給口糧以助之往時裏河運糧軍民相半軍則官爲打造淺船分長短中三運長運於淮安廣寧倉中運於徐州廣運倉短運於臨清廣積倉經年往復多失農月忱乃與平江伯陳瑄議奏軍民令於淮安瓜州等處水次對船交兌令衛所出

給通關付還銷繳兌船在江或遭風患忱又令州縣支糴餘米蓋倉二十餘厥於瓜川江畔遇到船糧搬入收貯聽候交兌畢日量支餘米願入看守又北京文武職官俸糧皆領票於南京戶部關領當米賤時一兩可買票米七八石忱因會議奏准折收金花銀兩納官每兩准米四石解運京庫交收折支京官俸糧其嘉定崑山等處折納官布每疋准正糧一石忱奏布疋斤重紗麤其價返賤紗細布輕其價乃高乞不拘斤重務在長濶如式兩頭織造色紗以防盜剪之弊從之正統初淮揚地方被災塩課虛欠忱奉

詔巡視乃奏令蘇州等府將撥剩餘米每縣量撥一
二萬石運赴揚州各鹽場收貯照數出給通關准作
下年預納秋糧其在場聽令竈戶將私鹽於附近場
分上納卽照時價給還糧米食用於時米貴鹽賤官
得鹽課積聚民得食米安生上下賴之五年轉本部
左侍郎八年大水爲諸郡患忱預奏量留官糧一二
萬石賑濟其年各處坻圩岸塍俱被衝塌時水利等
官先已裁革忱奏取曾經任過辦事官量撥一二十
員准其歷俸年月管修田圩開塞河道畢日送回吏
部未半載事完俱復舊十四年邊事緊急工部移文

成造盛申腰刀撒袋以數百萬計其盛俱要水磨明
亮忱取餘米依數成造且計水磨明盛非遲歲月不
可暫令擺錫以濟急用處事周而敏多類此本年入
覲陞戶部尚書尋改工部仍任前職忱在南圻凡二
十二年景泰二年乃致仕兩遭喪皆起復視事力辭
不允在事克盡心於所職爲人謙恭不立崖岸言若
不出口謀慮深長善采衆論徵輸皆有常度貢賦未
嘗稽欠且有贏餘遇屬郡有荒歉卽便宜從事撥餘
米以補不足之數凡官府織造供應軍需之類盡出
於所積餘米蓋民賦歲一石五斗之外漠然不見他

役之及已而官府無復科索之擾諸縣學校先賢祠各郡橋梁河道多所脩葺濬治一切取諸餘米人爭爲立生祠沒因以祀之年七十三謚文襄其後戶部言濟農餘米失於稽考奏遣曹屬盡括歸之官於是徵需雜出逋負自若人益思忱焉

羅通

羅通吉水人永樂十年進士授御史巡四川有風節永樂十九年奉詔言事與六科官並謫邊知州正統元年爲戶部員外郎理宣府邊餉陞兵部郎中三年從尚書王驥甘肅征阿台朶兒有功十四年冬虜報

至通守居庸關給事中孫祥守紫荆關廷議並授僉
都御史時景帝初卽位面諭吏部誤云副都御史
二人竟得爲副都御史通守關有方畧才警敏擒虜
酋那吉帖木兒提精兵五千南襲虜至拘羊山斬捕
虜有功召入叅贊軍務理院事疏乞勅石亨楊洪各
率精銳馬步官軍亨自紫荆出大同洪自居庸出宣
府沿途巡哨提督官軍堵塞關口脩理墻榨勦除賊
寇防護畊種又言邊軍妄報首功虛張虜勢得勝今
虜近在都門斬殺幾何陞六萬六千有餘又言腰玉
珥貂者皆苟全性命忌能憎賢時于公謙上言口外

軍民連歲被兵不能種藝恐擄寇野無所掠擁衆以
送駕爲名突至太原則山西搖動而淮南淮甸之間
亦可憂矣宜選有謀畧文職大臣往鎮山西上以
命通時昌平侯乞差文武大臣率兵出鴈門用鹿角
擡營護山西餽運大同上仍令通往三年冬上言
虜恃馬力出入塞下今也先使臣有馬四萬宜增價
酬之價重則馬益至不數年胡馬自空此挫弱強虜
之策也是年督兵逐虜懷來至長安嶺又斬首有功
龍門鷓鴣諸城殘破守將撤兵內徙遺芻糧數萬上
言虜來有鄉導欲奪芻糧守則軍力不足運則民財

不足焚則國用不足乞廷議戶部尚書金濂奏下通
及總餉侍郎劉璉總兵朱謙共計以上已而虜退請
班師還京協贊軍務四年上命通訓練將士是秋與
蕭維禎並陞左右都御史天順二年致仕弘治十八
年隆慶父老奏已巳之變通守關有保障功勅祠居
庸關

劉髦

劉髦永新人永樂戊子鄉試易魁後不果仕教授鄉
間學博行莊不干榮利事母以孝稱鄉人化其德所
著有易傳撮要脩身箴覆瓿集以子貴贈司經局洗

馬

劉子輔

劉子輔廬陵人永樂中自太學生擢監察御史持身
謹行儉約如布衣時用法公平嘗按臨浙江者三年
不見聲色而浙江之人善者愛之橫者畏之時憲使
周新持風裁不苟許與獨數數稱子輔爲賢御史九
載考最陞廣東憲使到官數日丁家艱去服闋左遷
交趾諒江知府不鄙夷其民撫綏如子民咸愛戴之
叛寇黎利攻圍諒江城時寇勢猖獗他郡縣賊多已
陷子輔與守將倡民兵效死數月寇增衆攻城城中

食且盡而人心益固又踰月寇攻益力遂破城城中
兵民盡力鬪以死無一人降者子輔知事不支曰吾
奉命守郡郡亾與亾義不可汙賊手卽自經死一子
一妾皆先子輔死事聞贈子輔布政司叅政遣官賜
祭復其家

劉 益

劉益吉水人進士第授兵科給事中封駁彈劾務存
大體嘗旱祈雨隨注人以爲誠感已巳北虜寇邊往
山東募民兵以備民賴以安陞湖廣叅議未幾 召
拜祭酒卒於官

劉廣衡

劉廣衡字克平萬安人永樂甲辰進士歷官至陝西
右布政使景泰改元進都察院左副都御史同西安
侯鎮關中條奏時政數十事隣境偏頭乏糧山西不
能給廣衡督運綏德倉米數萬石由口外往餉之軍
士感悅 召還理院事關浙間鉅盜鄭懷冒王孝忠
嘯聚官臺山爲亂廣衡奉 命討平之以官臺山險
絕而曠遠山銀鑛易致盜非伐山通道立縣以制之
不可於是請以山之楊梅村置壽寧縣定兵壯戍守
之法示銀宥啟閉之令民稱便立報功祠祀之尋擒

斬處州寇祝岳等命巡撫遼東天順改元以刑部左侍郎召還見便殿諭之曰用法無避嫌遷刑部尚書明年以疾乞休未行而卒廣衡敏歷中外執法三十餘年仁明剛決一統志稱其清修簡朴不事浮靡近古人云子喬登進士知歸安擢監察御史持風裁陞福建副使有奸人習通私番射利者遇貢舶輒給夷人餽遺鎮守三司科取珍貝事發衆欲貸之喬曰不可是示外夷以貪使輕中國也必寘諸法歷陞湖廣右布政使卒

劉球字廷振安福人永樂十九年進士授儀制主事
正統初 詔求文學之士胡濙薦之使同脩 宣宗
實錄錄成改翰林侍講時虜數請貢球深以爲憂會
麓川不靖王振議大舉伐之球請罷兵屯田遣使招
降專事西北以防虜患八年夏震奉天殿應詔陳十
事勤聖學總乾綱別賢否隆祀典覈吏治慎刑罰罷
營作定法守息兵威脩武備數千言振以球疏所云
總乾綱意詆振乃大怒曰必殺之會脩撰董璘自陳
願爲太常卿而球前疏言太常官須用儒臣馬順附
振喜曰此可并殺遂榜答璘使誣服球爲畫此疏者

矯旨逮球於朝班中捽之去球不知何坐縛至暗獄
中居數日振令馬順夜偕一小校推獄門入球同璘
臥急起小校前持球球知有變大呼曰 太祖 太
宗靈在天汝何敢擅殺我小校以刀斷球頸流血被
體屹立不動順以足踢仆地曰死猶強項復支解之
璘從旁拾球一裙密以遺球家始知球死行求屍順
故糜之弗得也而順有子年二十餘病孱久矣歛起
持順髮拳且蹴之曰我劉球也得請於帝殺汝順再
拜謝罪不可俄而子死順越數年亦被殺殺球小校
者盧氏人也耿九疇以其爲鄉鄰且美少年素暱之

小校既殺球久不至後復至九疇視其貌絕不類昔
訝之曰汝病耶小校媿且泣曰吾無病悔爲馬順誤
耳順欲殺劉公令懷短刃至獄我初不知爲順所迫
比聞劉公忠臣小人逆天死有餘罪愧見公小人從
此長逝不復詣公矣因慟哭悔恨去尋果卒球天性
孝友忠潔寬平議論堅正慷慨常依名節沉思積學
文詞鏗鏘金舂玉應人共寶之如月蟾天犀也景
帝卽位謚球忠愍贈翰林學士二子鈺鉞皆舉進士
球之死也餘姚人名成噐者於龍泉山巔爲壇以祭
而述古今權奸害正凡二千餘言爲文哭之人名其

地爲祭忠臺云

鄒緝

鄒緝字仲熙吉水人自少力學博極羣書爲文不尚雕繪自學官用薦陞國子助教 仁宗卽位擢翰林侍講尋兼左春坊左中允秩滿陞左庶子仍兼侍講與修 太祖高皇帝實錄及永樂大典居官勤慎小心國學缺祭酒屢奉僉署監事嘗患背疽 上特命中官督醫往療仍賜名藥緝務持正議與衆辨論不苟爲異同與朋友交必輔引於正或淪患難必極力濟之性澹泊祿食三十年儉素不改布衣時所嗜獨

書籍及卒家無餘資藏書數千卷而已

羅 肅

羅肅江西吉水縣人永樂進士選侍講改浙江道御史黎元利反交趾陞工部侍郎往探交人遣使入貢賜金衣寶楮復使交趾取回被留官軍還復賜犀帶牙香等物召入問元利事情力止聖怒再征差河南山西陝西賑濟陞都御史總督陝西致仕

嚴 樞

嚴樞江西萬安縣人正統十年進士除湖廣道御史巡按陝西廣西與藩王許奏降麗水縣典史陞長興

知縣告病回籍卒

張 洪

張洪江西安福縣人正統十年進士除湖廣道御史
巡按四川從駕北征死于土木之難

羅 俊

羅俊字彥華江西泰和縣人正統十三年進士除湖
廣道御史景泰元年巡按四川三年丁憂復補浙江
道建言降新會縣典史陞仁化知縣潯州府知府調
南雄府卒

張宗璉

張宗璉吉水人同知常州府事喜爲民興利行視水
教蓄泄躬履壘畝察種植而勸率其勤不職者或時
坐阡陌間與民相爾汝如家人未嘗咎詈人遇老病
鰥寡尤加恩焉新學校正士習民甚戴之會以直民
忤清軍御史憤憤發疾卒宗璉生平澹泊毫不苟取
自舉進士入翰林吉士爲刑部主事春坊中允已乃
出未嘗以家累自隨一室蕭然及疾病醫入室索燈
燭無之僮出取膏油一盂入望見以爲從外入也謝
卻之其操如此卒之日老壯奔歸哭奠者累日柩行
白衣冠而送者數千人